

“Speranza”

STA. CRUZ -- SPERANSA ta nomber cu Poentje Castro a duna su ultimo edicion di e programa ala estilo Talk Show mas sintoniza na tur e islanan ABC “Un Dia Den Bida”. E cabayero aki a demostra cu pa un host por tin existi na TV, consistencia mester ta bo arma mas fuerte y berdaderamente esaki ta loke cu e programa aki a demostra den e mas di 4 ½ aña tras di lomba.

Un Dia Den Bida un programa cu a demostra cu bo no mester tin un bida ehemplar of un bida exitoso pa por ta un invitado den e programa, sino simplemente bo mester tin un bida cu un otro por siña di dje. Esaki tambe ta e lema cu ta pararece riba tur letterhead cu Poentje ta usa ora di manda carta of cera contract. Den e ultimo edicion pa aña 2006 Poentje ta bay combersa cu un mama cu ya pa 5 aña ta den agonía, frustracion, desesperacion, for di e



momento cu e noticia a drenta cu su yiu di apenas 7 aña ta sufrí di un cancer cu tin nomber y fam, esta Willems Cancer. E cancer aki ta inicia su presencia na riñon di sernan humano. E señora ta conta e bon trato cu el’a ricibi di AZV na comienzo y cu despues cu e minister en cuestion a dicidi di a hala faha mara, e bon trato ta tuma un rumbo abrupto y temporada di mal experiencia y desapunto ta cuminsa cu e famoso AZV di Aruba. Remedinan y vitamina cu e pover señora mes mester paga for di su cartera cu nunca tin placa aden, ya cu e mester a kita for di trabao pa cuida su yiu cu tabata aborde di morto y cu e 750,- florin di onderstand cu e ta risibi no ta yega pa e extra medicamentonan. SpecialmentepasobraAnthony e criatura cu ta sufrí di cancer, mester drumi den airco y esaki ta pone cu automaticamente e recibo di coriente ta bin haltu y poniendo awa ariba e famia ta resta 250,- florin pa cuminda, paña y remedi adicional cu AZV no kier paga. Anthony mes ta conta su experiencia ora cu e ta ricibi 5 diferente di Quimo Therapia. E ta conta Poentje kico exactamente e ta sinti, su dolo y su sufrimento pa por sigui biba.

Un mucha cu ta convenci cu Dios no kier pa e muri y ta splica dicon e ta pensa di e manera ey. E palabra cu e mucha mes ta usa ta SPERANSA. Aruba, Curaçao, Bonaire y Sint Maarten ta keda cordialmente invita pa sintonisa Tele Aruba canal 13/23 of TDS canal 13 pa un edicion cu lo kibra bo curazon titular Speranza. Diadomingo 30 di December pa 5’or atardi y cu cambio pa e siman aki di Diamars 2 di December pa 9’or anochi. NO PERDE.